

# Vizyon

## Protezh fermye e fanmiy Seselwa

**T**ou Seselwa i konsenen avek sitiasyon pri lavyann dan pei. Depi ki Gouvernman SPPF in fer monte pri manze zanimo, i annan en katastrof dan pei. Lo en kote fermye pe trouv li difisil pou aste manze zanimo e kontinyen avek prodiksyon, e lo lot kote pri lavyann in vin enn ki Seselwa pa kapab peye. Pour premye fwa dan listwar nou pei, en poul i kout plis ki R100 e en kilo pork osi in sot R100. Kote nou pe ale? Eski SPPF in abandonn sa pep ki i ti dir i kontan e i pou pran swen avek? Seselwa i dezespere.

### Gouvernman fodre responsab

Aksyon gouvernman 10 zour pase i enn ki pa responsab. SNP in tou-l-tan dir ki premye priorite en gouvernman se pou fer sir ki son pep i ganny ase manze lo son lasyet. Bob Marley i dir byen kler 'A hungry man is an angry man.' Me letan en gouvernman i fer konmsi i pa tann soufrans son pep lo size manze, la alor i pe klerman montre ki i annan lezot preokipasyon e in vreman perdi lenter dan son pep. En gouvernman responsab pa les keksoz deteryore avan ki i azir. Okontrer i pran aksyon avan ki son pep i komans soufer.

### Fermye pe soufer

Fermye i form en group travayer tre enportan. Pa tou dimoun ki kapab fer sa travay ki zot fer. I dir, e rannman souvan i pa sa ki zot prevwar. Ozordi nou bann fermye pe soufer. Zot annan bann det atraver bann loan ki zot bezwen peye, zot annan zot zannimo pou pran swen avek. Tou lede i tre enportan e ou bezwen okipe. Labank pa gete ki ou pe pas ladan. I konn son larzan. Menm parey avek sa zannimo. I pa konnen si pri manze in triple. I konn son manze e ou pa kapab dir li i pou bezwen manz mwens. Akoz ki gouvernman en kou an-gran i abandonn bann fermye e les

zot debout zot tousel pou fer fas avek zot bann difikilte?

### Tou prodiksyon pou soufer

I kler ki avek sa sitiasyon, tou prodiksyon pou soufer dan nou pei. Letan prodiksyon zannimo i tonbe, napa fimyen e alor prodiksyon legim osi pou tonbe. Eski gouvernman pa war sa ki pe arive, e ki mannyer i pou afekte nou popilasyon? Vreman sa gouvernman SPPF in oubli sa bann ki ti siport li e kriy byen for 'Pa file kaptenn' e 'Tenir, pa large!'

### SNP: Sel lespwar pou Sesel

Ozordi dan Sesel, sel parti politik ki pe vre-

man debout lo kote Seselwa se SNP. Nou'n fer tande nou lavwa, e kwa ki nou kwar i vreman enportan pou sanz sa sitiasyon. SNP i konvenki ki gouvernman i bezwen sivansyonn kou prodiksyon manze zannimo pou fer pri lavyann bese afen ki tou Seselwa i ava kapab viv byen. Avek tou keksoz ki pe ogmante, i pa akseptab ki gouvernman i les pri manze kontinyen ogmante e lav son lanmen dan tou sala. SNP i ekout soufrans lepep, e nou pou kontinyen defann zot e rod sanzman.

## Sov 'Pti Zil' pour Seselwa

**A**nba Mr. James Michel, Sesel pe ganny vann bout par bout. Sa ki tris se ki Seselwa i kontinyen perdi morso son teritwar, e bann landrwa kot nou ti abitye al fer piknik pe ganny pran avek nou, e zis etranze ki pou kapab 'enjoy' sa bann landrwa. Sa kosmar pe vin vre pour zabitan Praslin. Byento 'Pti Zil', sa landrwa popiler ki ganny frekante par bokou Praslinois pou nepli en landrwa piblik, me prive.

Group hotel 'Raffles' ki'n ganny sa landrwa, in fini komans fer nouvo semen ki pou pas dan montanny akoz li i bezwen borlanmer. Sa semen dan limenm i en sel katastrof, me ki wa fer, Praslinois i bezwen kile pou les etranze pase!

E pourtant sa krim pe ariv dan distrikt kot plis dimoun ti vot pour SPPF. 75% dimoun Baie Ste Anne ti vot pour Mrs. Mitcy Larue, e ozordi nou war ki sa madanm i tro feb pou defann drwa akse Praslinois. Akoz ki Mrs.

Larue pa ti demann sa 75% zabitan pou sinny en petisyon, e menm fer en protestasyon kot 'Pti Zil' pou ensiste avek gouvernman sa ki Praslinois i anvi?

SNP i kontinyen ensiste ki Praslinois e tou Seselwa i kontinyen ganny akse avek sa lans pou fer piknik. SPPF pa kapab kontinyen zis fer kado pli zoli bout nou zil avek etranze. Nou osi demann Mrs. Larue pou anmenn mosyon dan Lasanble e SNP i ava siporte.



# Ogmant tonaz Stevedores

**D**an sa moman bokou soufrans pour tou fanmiy Seselwa, SNP pe fer en demann kler pour ki bann stevedore i ganny en logmantasyon dan tonaz pwasoiz ki zot tire dan bann bato lapas.

Sa ki nou pe demande i pa zis en zes politik parey Dr. Patrick Herminie ti fer avan eleksyon dernyen fwa. I ti demande pou ogmant tonaz pou vin R3 zis koman en bat latet pour bann stevedores. Malgre ki SPPF ki o-pou-vwar ziska prezan, zanmen sa in arive. E menm ozordi letan ou koz lo sa size dan Lasanble, i riye konmsi ya pe dir 'Mon'n vremen bat latet sa bann stevedores!'

Demann SNP i baze lo serten keksoz spesifik. Roubi ozordi pe flote e son valer vizavi dolar in tonbe e i vo zis 30 sou. Lefe ki tou bann lakonpannyen bato lapas ton i pey an

dolar, fodre ki tonaz i reflekte nouvo pri dolar. Si letan dolar ti vo R8.50, stevedore tya pe ganny R2 par tonn, i vadir ki avek en dolar R18, tonaz i bezwen ariv omwen R5.

Dan SNP nou pa pou zanmen fer bann demann ki ekzazere oubyen ki pa rezonnab. Demann ki nou pe fer ozordi i enn ki devret ganny pran o-serye. Apre tou, sa bann stevedores i bezwen fer fas avek sa pri lavi ki'n ogmante. Zot osi annan en fanmiy.

Lendistri lapas i enn ki depann lo en bon servis sa bann zonn ki travay dir. Nou espere ki zot kouraz i ava ganny apresye e ki Gouvernman i ava aksepte pou negosye lo lapar sa bann travayer afen ki toutswit zot ava ganny sa logmantasyon dan tarif. Sa i ava ed zot nourri zot fanmiy e fer en Nwel agreab.

## Ki kalite lazistis?

**N**ou kontinyen viv dan en pei kot SPPF in fer lazistis vin en fars. Lazistis i depann lekel ou, e ki parti ou siporte. Nou'n war sa klerman dan zizman Christopher Frichot, garson ansyen Minis Pool.

Sa imsyte ti ganny atrape avek en pistol dan lavi apre ki i ti'n menas en dimoun. I ti pas en lannwit dan kaso, apre i ti ganny large. Pour son zizman, Sef Ziz ti kriy en Mazistra dan son biro e la sa imsyte ti ganny kondann selman R2000. Pourtan en zonn Grand Anse, Mahé ti ganny kondann 18 mwan prizon pour menm lofans dan lefase.

Konmdir koze, si ou en pti nwanr touni ki napa koneksyon, ou pou soufer dan sa pei, me bann lanperer SPPF pou kontinyen byen pase.

## Pa oubliy travayer dan prive

**B**okou travayer dan sekter prive i santi ki ankor enn fwa zot in ganny oubliye dan sa logmantasyon lapey ki fek ganny anonse. I vre ki serten lakonpannyen prive in deside donn sa somm R450. Me malerezman mazorite bann lakonpannyen pa pe donn okenn logmantasyon. Alor, nou dan SNP, nou demande ki sa bann travayer pa ganny oubliye aköz zot osi zot zwe en gran rol dan lekonomi.

Apre enn son rankont State House, Prezidan SCCI ti dir ki i siport desizyon gouvernman pou met dimoun deor e pou donn logmantasyon lapey. Nou enplor sa lognizasyon pou ed sa bann travayer pou ganny en lanplwa dan sekter prive, e pou osi dir tou zot manm pou donn travayer sa logmantasyon lapey.

# Fer monte lapey

**S**a pti logmantasyon lapey R450 pa ase pou travayer. Letan SPPF ti sanons sa logmantasyon, personm pa ti ekspekte ki lavi ti pou vin sitan ser. Ozordi i kler ki R450 i kouvert logmantasyon mwens ki sa 13 itenm enporte par STC. I pa ase pou fer fas avek sa lavi.

SNP, atraver Onorab Sandy Arissol, ti demande ki gouvernman i donn en logmantasyon omwen R1000 pour travayer. Malerezman letan i ti fer sa, Madame Potter ti mont lo son gro seval e deklare ki si SNP ti anvii logmantasyon lapey pour travayer, nou ti devret mont State House e dir sa Mr. Michel.

SNP pa bezwen mont State House pou demann sa. Nou war soufrans sa pep, e lo non sa menm pep, nou pe demande ki Minis Finans i konsider en nouvo logmantasyon lapey pour tou travayer.

## Aret anbet Seselwa

**K**arbiran in vin en size ridikil. Tou Seselwa i konnen ki gouvernman SPPF pe bat nou latet lo sa size. Annou regarde.

SEPEC i dir nou ki zot bezwen ogmant pri aköz zot ti aste en gran stok ser e devaliasyon in fors zot ogmant pri. Eski SEPEC i kapab dir nou dan ki stok sa benzin pi e ki afekte loto i sorti? Eski i sa vye stok ki'n kontaminen, oubyen eski i en nouvo stok?

SEPEC i dir nou ki sa benzin pi i normal e i bon. Aköz alor ki in annan tou sa bann loto ki'n ganny problem? Eski problemm i avek sa kantite loto e non pa avek benzin?

Fodre ki SEPEC i vin dir nou klerman ki sa benzin ki zot in fer vini i pabon. Aksepte ki ozordi zot pe bat latet Seselwa. I mal sa.

## PAS PARTOU

### Dokter Malelve

I pa byen ditou lafason ki Dr. Payet in konport li kot match final St. Louis/St. Michel. Apre en pti problemm kot gate, tou kalite parol in ganny esanze. Gro-gro parol in anvole zis aköz en boug ki pe ganny li plis ki R20,000 par mwan ti anvii rantre pour nanryen, li avek son fanmiy. Doc, konport ou mon frer. I pa normal letan ou fer tou sa kalite konser dan piblik!

### I mous dife ek masala!

2 pti parol dan Lasanble in fer en gran semesyte ki ti debark Sesel dan en per

savat may dan pous mous dife ek masala. Byen sir, sa boug ozordi i koz bon labous aköz masin fer larzan i dan son pos, e i fer sa ki i anvii dan sa pei. Avek tou sa bann zafer ki pe fatig li, sa boug ozordi zis pe maltret tou son travayer, e i menm resanble i pou bezwen kit pei aköz tansyon tro o. Relax Bouligenn, lager fek komanse!

### Vakans a-letranze pour imsyte

Dapre lenformasyon ki nou pe gannnen, gran imsyte in fini fer son booking. Dan milye sa sitiasyon difisil pour Seselwa, i pe pran son fanmiy e pe al pas Nwel ek lannen lo laferm e les Seselwa manz pikan.

## SNP Lottery

**WIN WITH THE SNP !**

### PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

**R10/-**

